





Opgedra aan almal wat sin soek in sinne.

Sonstorie saamgestel deur Fanie Marais

CORDIS TRUST PUBLIKASIES  
Posbus 73592 Lynnwoodrif 0040  
Dr. S.J. Marais  
Uitvoerende Trustee Cordis Trust  
faniemarais@cordistrust.co.za  
www.cordistrust.co.za

© 2018 Fanie Marais

Eerste uitgawe Eerste druk 2018

ISBN 978- 0- 9946913-7-8

Manuskripsamestelling: Fanie Marais  
Elektroset en proeflees: Myra Lochner  
Geset in Constantia 11 pt  
Titelfont: Rancho  
Outeursfont: Cormorant Upright  
Omslagontwerp: Herman Lochner  
Omslagkuns © Vader Frans Claerhout  
Gedruk en gebind deur STN Drukkers, Pretoria

# Sonstorie

saamgestel deur

Fanie Marais

Inspirerende woorde uit die leewêreld van 'n jong  
dogter, Mardene Marais (1968 – 1989), as *Woordpalet* in  
1992 gepubliseer.

[www.woordpalet.co.za](http://www.woordpalet.co.za)



**CORDIS TRUST PUBLIKASIES**

Pretoria · Suid-Afrika

2018

*“Ingeval ek dood wakkerword,  
gaan my dagboeke en gedigte  
aan enigeen wat met moeite  
moeite sal doen om te verstaan.”*

# INHOUDSOPGAW

Huldeblyke	1
JY	1
SONSTORIE	3
Kom ons droom vandag	3
Sommer net	4
Om te leef	5
Offer	6
Jasmyn	7
As ek ek bly, sal jy ...	8
Somber	9
Vergifnis	10
Teddie	11
Verlange na die Kaap	12
Gesin	13
Pa	13
Ma	14
Surita	15
Sanet	16
Kunsmuseum	17
Johannesburg	18
Dali	19
Johan	20
Kwatryn	21
Gelyk-aan	22
Ontbluf	23
Dagbreek	24
Liefde	25
Geluk	26
Vrees	27
Die son	28
Skanse	29
Duisternis	30

Einde	31
Analise	32
Sekerheid	33
Introspeksie	34
Semanties	35
Ontkiem	36
Binneblik	37
Uitbundig	38
Kerk	39
Rigtingleeg	40
Gras-u-is	41
Skalpel	42
My land	43
Skepping	44
Lig	45
Kunstig	46
Opstand	47
Lewe	48
Vreemdes	49
Illusie	50
Vanselfsprekend	51
Egoïsme	52
Ek en Jy	53
Vergeete	54
Liewe Ma	55
Dagbreek	56
Afskeid	57
Betta se hoed	59
Om 17 te wees	60
Ek is gereed	61
Sonstorie	62
Die wêreld is 'n speeltoneel	65
Vandag is die eerste dag van die res van my lewe	67
Die gesig in die spieël	70



## HULDEBLYKE

JY

*tussen gespikkelde studente  
was jy die flamink:  
rankerig in rosige  
ledemate, hare  
wegknetterend  
skoongeskroeide oë  
vel soms mat en  
gladde hulsel  
gespanne  
om die skraal skelet  
en breekskyn sprokkels  
sproete deur  
                                gebrandglas  
in flikkerende versfragmente  
stywebeenritmes, reiermeganiek  
van gebroke enkel-  
woorde  doop  
jy jou pen kleur-  
skellend in potjies  
opgekropte plakkaatverf  
op weg uit jou liggaam, jy  
tril folminke ook op uit die as?*

*Rika Cilliers Preller, Vlier*

*Jy het kinderlik nuuskierig  
die some van sin(ne) losgetrek*

*die aarde wat soos leeglê  
swaar(de) op jou hart druk  
het jy probeer wegklap  
maar is van balans geruk  
en die worp van die son het jou gedryf  
om met leë hande te soek na 'n nuwe dag*

*jou voetval was egter te vlugtig  
en jou naels te stomp  
om die borsvliese van nuwe lewe  
verwoed oop te breek*

*al het die son self op jou droomhofie gevlam.*

*Uit gedig van Sulia Holtshauzen*

## SONSTORIE

### *Kom ons droom vandag*

*Kom ons droom vandag  
ons pluk vir ons sterre  
en draai hulle in sonstrale toe.  
Ons kokon onself in die wolke toe  
en glyplank by reënboë af.  
Kom ons gesels met die feetjies  
gaan ry op seeperdjies  
en bou vir ons 'n towermat.  
Ons gaan braai marshmallows op die maan  
verfgisters bont en ryg dit in vir krale.  
Ons drink die see leeg  
en gaan bou skilderye in die lug.  
Kom ons droom vandag  
– toe?*

## ***Sommer net***

*Ek is sommer net.*

*Ek is die blinkrooi hartjie aan my sleutelhouer.*

*Die kunsprojek teen die esel.*

*'n Bondel lag in die middel van die week.*

*Dis alles ek.*

*Ek is ek en ek is honderd persent.*

## ***Om te leef***

*Manjifiek is dit om te leef  
in die hart van lig –  
om te vlieg na die son.*

## ***Offer***

*Jy het my getoor,  
my vervorm tot 'n bloeisel  
en 'n affodil in jou oop hande,  
maar agterna het jy my verdrink,  
my aan vergeet geoffer  
en jou towerstokkie  
in jou hande toegevou.*

## ***Jasmyn***

*Die son ruik na jasmyn  
en met jou verf God my,  
pluk vir my affodille  
en brand hulle op jou ashoop.*

## ***As ek ek bly, sal jy ...***

*As ek vroeg opstaan  
en myself geel verf  
As ek verlep voel en my vensterruit  
is stukkend  
As môre oorslaan na oormôre  
en oormôre na die dag daarna  
As my Bybel halfpad is  
en ek kwartpad  
As ek pers en oranje in my voel  
of blou teen my afgly  
As ek bang is of as ek grys en koud lewe  
As ek borrel of as ek skilder  
As ek ek bly  
sal jy nog steeds jy wees?*



## ***Somber***

*Vandag was vol.  
Vol reën en hartseer  
en weerlig en stap  
en vol musiek en sommers.*

## ***Vergifnis***

*As gister hardop soek na nou  
en nou vergewe kwart.  
Voel ek bang en alleen  
– is die son anders, half.  
Gaan môre saggies dood  
of skaduwee die maan oor my,  
moet ek weet  
dat sy Alles  
my gister vroegdag al  
my nou laat vind  
en nou 'n verdere driekwart  
laat vergewe.*

## ***Teddie***

*Ek ken jou goed,  
jou hart – onstuimig, rustig, kwaad, hartseer, alleen:  
jy het my vertel, jy het my styf vasgehou,  
jou trane het op my gedrup.  
Jy het my heelgemaak,  
gewas,  
gedeel,  
en eendag ... weggegee.*

## ***Verlange na die Kaap***

*Ek bondel my gedagtes binne my op  
draai my gisters in krinkelpapier toe  
en berg die Kaap rondom my  
tot ek seerkry en  
halfpad langs my geluk  
my oë stadig toemaak.*

*Ek het die see om my nek gehang  
die mense in my hare gestrik  
die berge oor my geverf  
die gisters een-een om my arm gebind  
die verlang dieper weggebêre  
agtien jaar in my onthou gesirkel  
en die Kaap honderd persent in my ingeskilder.*

## ***Gesin***

### **Pa**

*Pa is volgefrommel met vandag en*

*'n gebed in die skemerte*

*Pa is môre vermeng met*

*'n godgeverfde sonsopkoms*

*Pa is heeldag 'n heel dag.*

## **Ma**

*Ek wens vir Ma dae vol drome  
en sterre aan Ma se hemel  
Ek wens bont kleure in Ma se lewe  
Ek wens 'n kaggelvuur vir Ma se voete  
Ek wens vir Ma net honderd persent  
en ek wens Ma altyd in my lewe.*

## Surita

*Jy is die borrel-bruis-borrel lag as dit reën*

*Jy is ek minus drie*

*Jy is reënboë in potpourri-sakkies*

*Jy is God se hand by die wiel*

*en jy is sommer*

*is net jy.*

## ***Sanet***

*'n Verfpot val om en drup-  
drup op die grond*

*Dis jy wat val en oopvlei  
in helder kleure en bont idees  
in gedagtes in dade in gister  
vandag en môre*

*Dis 'n meesterstuk  
en onderaan die raam  
is die handtekening van dié Een wat die verfpot  
omgestamp het.*



## ***Kunsmuseum***

*Ek kuns deur die museum  
en bondel die kleure tot diep binne my  
my oë verf oor die skilderye  
en ekspressionisties word ek deel daarvan  
my hele bestaan ry wipplank  
en bedwelmd kan ek nie genoeg kry nie  
ek raam my gedagtes  
en vernis dit vir nou  
môre  
en die oormôres in my drome.*

## ***Johannesburg***

*Blou-grys mondrianagtige silhoëtte  
profiel selfsugtig  
en vergeet materialisties om lief te hê  
Duisende naamloses  
en bewegende gesigloses  
môres wat van gisters herstel  
uithangborde in versmoor-kleure  
oormôres wat halfpad ophou onthou  
en nommers een-een ingeryg in garedraadjies.*

## ***Dali***

*Kwart bestaan jy nog  
hospitaalryp in jou  
wêreldopskrifte langs jou  
oor die meester wat  
deel en minus op sy bed  
surrealisties propageer jy lewe  
en bêre jou liggaam onder  
jou eer, maar jy vergeet pateties  
om die halfklaar skildery skuins  
oor die esel te bedek.*

## ***Johan***

*Die see breek branders in jou oë  
en die sterre dans oor jou gesels  
Jy's witsand met pynappelsap  
gedigte en sonsambrele  
verlang ek laatnag  
Jy is my beertjie  
die kunsmuseum  
en wit skaduwees oor bondels sand  
Jy is die raam om my skildery  
die strale rondom my son  
die aanhalingstekens voor gedigte  
en die onderstreepte versies in my  
stranddiensbybel.*

## ***Kwatrijn***

*Sy het met 'n rooi bal in die straat gespeel  
en hom op en aflat bons  
maar toe het Jesus gekom  
en haar aan haar hand weggelei.*

## ***Gelyk-aan***

*Ons neem saam wiskunde  
en al wat ons saamvoeg  
is die simpel is-gelyk-aan-teken  
in die nimmereindigende somme.*

## ***Ontbluf***

*Skeinat proefbuis my in  
en helium hou my geel vas  
Ek bou my self stukkie vir stukkie  
in 'n waterstof bondel toe  
en ontbloot my naaktheid  
in 'n kiertsreg op ontbluffing.*

## ***Dagbreek***

*Dagbreek is  
as die maan op sy kop staan  
en die son bo-oor hom  
bollemakiesie slaan.*



## ***Liefde***

*Liefde is 'n goudgeel strik  
in 'n mongooltjie se hare.*

## ***Geluk***

*Geluk is geel  
wat sypel deur oranje  
en rooi huppel tot by groen,  
wat opgewek met blou versmelt  
tot 'n stringetjie pers.*

## ***Vrees***

*Vrees rek homself uit  
en verf met 'n kiewelende kwashaal  
alles rondom hom bloedrooi.*

## ***Die son***

*Die son is die duiwel se binnekant  
na buite gedop.*

## ***Skanse***

*Die kasset in my radio probeer homself troos. Die note klou aan mekaar vas, maar hul grys lyfies bly hartseer. Hul huil klingel vals in die agtergrond en ook in my kom draai die pyn en hartseer vas.*

*Ek sit opgevou op my bed en bou desperaat skanse teen my trane.*

*Die wysie breek en soos die note mekaar se arms los, verwyder hulle hulself van my, totdat ek sonder musiek sit.*

## ***Duisternis***

*Straatengel Lucifer kyk hoekig om en in sy oë  
staan die wêreld regop.*

*Hy skuif sy gesag reg, buk af en tel sy gevolg op.*

*Met swart voetspore verwoes hy voort.*

*Sy septer kap gate in die grond.*

*Hy sal nie rus voor die ganse aarde  
soos 'n geroeste rasper lyk nie.*

## ***Einde***

*Gretig amper ek onverskrokke verby my self.  
Kamofleer God grappig en  
verlaat die stratosfeer  
van bestaan aan skerwe.*

## ***Analise***

*Hou jou bek, samelewing  
en analiseer eerder jou siel.*



## ***Sekerheid***

*Die derde laaste druppel wat  
vanoggend in my bad val  
het eergister al geweet dat  
God oormôre kom.*

## ***Introspeksie***

*sout sekel jy  
my samelewing selektief binne,  
introspekteer formeel analities,  
sonsondergang in God se paradys.*

## ***Semanties***

*semanties swanger ek  
'n geesteryk deurmekaar  
saggemaak en  
sorg vol gekatkiseer.*

## ***Ontkiem***

*saad groei  
ont kiem  
en bloei dood.*

## ***Binneblik***

*mens voor  
her stel  
en ont plof in waarts.*

## ***Uitbundig***

*Ons  
bons  
God  
giggel.*

## ***Kerk***

*Kerk parthenon kragvol  
op swaar fondamente  
klipwand vasgepilaar in eie kern  
heilige kleure omgebied in agting  
en vol krag gemessel deur ruimteloosheid.*

## ***Rigtingleeg***

*Hek marsjeer in stadige aksie  
na gevangeskap  
mense mens rigtingleeg  
oor breërwordende grense  
en net een-een padkaart  
verby die traliewerk.*



## ***Gras-u-is***

*Fiets vou vervaard oop  
mens ma-keer met eens  
bestaan hyg heen  
en God glimlag gras-u-is.*

## *Skalpel*

*Kom, alle genooide ontlede analiseerders  
pluk vir julle 'n deel van my  
teen oor gesteldene  
want suurlemoen versus katjiepierung  
die maan simboliseer duisternis.*

## ***My land***

*baie het gebeur  
goeie dag Suid-Afrika is ou nuus  
ek affodil innerlik  
oor God weet wat*

*en die kerk klap hande  
goedertrou  
verveeld.*

## *Skepping*

*Die weerlig hou swaardgevegte  
voor my venster  
ek kan nie anders as om met die weerlig te gesels nie  
te sien hoe dit die grys oopte oopforseer  
en ek hartseer wonder  
oor die pyn  
die breek  
en wat van al die gewonde hemelstukkies word.*

## *Lig*

*my neus is my dakkamertjie  
my oor my ek's so dus  
my mond kar na val  
God my oog  
en my nael & kie  
my tel 'n foon.*

## ***Kunstig***

*waarskynlik sterf en ontbind  
ek tot my inwendige samestelling,  
my kuns dali ek  
onbewusvol deur  
en baklei handhawend –  
skisofrenies.*

## ***Opstand***

*Opstand lê besoek af  
Formeel en ongenooïd  
Die analitiese oë wonder op en af  
oor elke asemstoot  
en elke sillabe.*

## ***Lewe***

*Die mens multifiseer op note,  
maar tog is die note vals.*



## ***Vreemdes***

*Ek kry elke vreemde vervreemde  
intens jammer  
en hou vir hul 'n massabegrafnis  
in my genagte gedagtes  
tog hopeloos hul voort  
om met skewe boublokke te bou.*

## *Illusie*

*Dis lentedag en ek voel soos 'n winterboom  
Partykeer is ek lief vir mense  
Ek het in 'n droomwêreld geleef  
soos in 'n storieboek  
waar alles goed gaan  
en daar feë en selfs gawe hekse is  
en toe word ek wakker  
en sien net gifappeltjies.*

## ***Vanselfsprekend***

*Ek voel so vanselfsprekend  
Ek is en bly altyd 'n is  
nie 'n wees  
of selfs 'n was  
of 'n sal nie.*

## ***Egoïsme***

*Eintlik lewe almal maar vir hulself  
iemand wat nie self daar was nie  
sal nie weet nie  
klein Brixton-kindere  
wat geen regmatige kans  
in die lewe het nie  
swanger op twintig  
en 'n baba  
vir God weet wie.*

## ***Ek en Jy***

*Jy is spesiaal, my vertroueling, nes my een-oog-lappop van lank gelede.*

*Dis ek en jy wat saam op 'n tweemans-fiets ry en dis ons twee wat ook saam afval.*

*Dis ook ons twee wat Hom saam ken.*

*Dis ek en jy. Jy en ek ... soos twee dagboeke vir mekaar. Dis die kombinasie ons.*

## ***Vergete***

*Die koerant het natgereën. Voorbladnuus. Laat ons  
maar kyk ...*

*“Meisie pleeg selfmoord. Agtien jaar oud.”*

*Die letters het nat geword.*

*En die drukkersink huil nou daaroor.*

## ***Liewe Ma***

*Ek het vir Ma 'n groot gestrikte doos (spesiaal uitgesoek) om elke dag van Ma se splinternuwe ouer-word-jaar op te helder.*

*Ek noem dit myne, want daar is 'n potpourri van eie-ek dinge toegestrik daarin.*

*Binne-in die doos is alles wat ek altyd in my kamer laat rondlê het en nou opgetel het.*

*Nou's my doos amper leeg en heel onder lê my geluksê-kaartjie. Eintlik meer 'n dankiesê as 'n geluksê-kaartjie. Dankie vir alles wat ek deur Ma se oë van die wêreld leer ken het. Vir al die kere wat ek my probleme met Ma kon deel en vir die onuitwisbare invloed wat Ma op my lewe gehad het.*

*'n Duisend dankies en baie geluk.*

## ***Dagbreek***

*As die wekker vroegoggend lui,  
staan ronde engeltjies slaperig op.  
Hul vlerkies word afgehaal,  
want die groot werk wat voorlê, kan soms vuilsmeer.  
Elkeen weet presies wat om te doen.  
Die Groot Kunstenaar het hulle self geleer.  
Op twintig bedkassies is bont kwasse  
reeds die vorige aand reggesit.  
Hulle is gereed.  
Die eerste laag is donker na rooi.  
Hulle stry en raas nie. Hulle werk saggies,  
want die ouer engele lê nog toegekussing in hul stukkies  
hemel.  
Sodra die eerste laag droog is, word dit rooi na oranje.  
Hier en daar loop plomp voetjies oor nat verf  
en op die aarde sien mense hoe dit kol-kol lig word.  
Oranje.  
So te sê droog.  
Ligroos.  
Haastig.  
Die Leermeester se wekker lui.  
Persblou.  
Hy trek net sy kamerjas aan, dan gaan Hy kom kyk.  
Glimlag goedkeuring.  
Pienkblou.  
Vuil gesiggies opgestop met tevredenheid.  
Dagbreek.*



## ***Afskeid***

*Ek's by die see  
en voel hoe hy met my gesels  
Ek het met my Bybel (toegedraai in pers)  
gaan stap  
en skilderye gebou op die strand.*

*Ek verlang na Witsand  
en die gesels  
en andersheid  
my soetwyn  
is groen langs my bed.*

*My beertjie is nie met my nie  
en ek wonder nogal  
ek bly by die huis  
as die ander gaan laataand  
en skryf 'n brief.*

*Halfpad kan ek nie  
sover kom om 'n gedig te skryf nie  
ek is lus vir huil en slaap  
ek lees Psalm 139 (my Psalm)  
en voel beter.*

*Toe dit heeltemal donker is bid ek  
en ek onthou dat ons oormôre ry –*

*ek sal môre die Kaap totsiens sê  
en die see om my nek hang  
die mense in my hare vasknoop  
die sand oor my tone verf  
die gesels aantrek vir klere  
en sommer alles inpak vir saamneem.*

## ***Betta se hoed***

*Betta was wit. Betta was 'n hoed.*

*Jonas was bruin. Jonas was 'n das.*

*Maar die mense wou die hoed en die das nie laat pas nie.*

*En hulle het getrou.*

*Die hoed en die das het gepas!*

*Meesterlik.*

*Volkome.*

*100%.*

*En daardie aand het die aandster blinkgepoets aan die  
Melkweg gehang.*

## ***Om 17 te wees***

*Hy repeteer. Repeteer vir die lewe, wat hom blindelings  
gaan rondwaai en gaan uitspoeg as ontalentvol.*

*Die mense kyk, ondersoek en veroordeel.*

*Hy is jonk, nog maar 'n kind in die wêreld. Die mense het  
hom klaar opgeskeur.*

*Sy dowwe oë begin weer blink. En die bloed wat hy gemors  
het op hol mense, vloei in hom terug. Hy is ook iets – hy  
bestaan nie net nie.*

*Hy is spesiaal iemand net vir iemand.*

*En hy beseft, om altyd niks te wees en dan skielik iets – dit  
is om sewentien te wees.*

## ***Ek is gereed***

*Ek lê opgevou in my ma se maag.*

*My ma sê ek is goed verpak en niks kan my seermaak nie.*

*Mens kry ligte en donker dae. So sê Ma. Sy sê ek het nou net ligte dae in my lewe, maar sodra ek uitkom gaan hulle donker word. Gelukkig hoef ek nie bang te wees nie, want sy sal my beskerm.*

*Die reënboog. Ja, ek onthou wat Ma my vertel het van die reënboog. Almal het reënboë. Ek kry myne eers oor 'n rukkie. Sy't gesê ek kan hom enige kleur wat ek wil hê, verf.*

*Uit die grootmense se storieboeke lees my ma vir my van die rondomtalie waarop sy woon. Ek het nog niks geels gehoor nie. Alles was sover nog net swart.*

*Sien, my ma het alles vertel. Ek is maar nog net halfpad, maar ek is gereed om oor twee weke heel te word. En as ek eers heel is, gaan ek elke dag my reënboog natgooi, ek gaan sy punte strek en stewig vasboor, ek gaan probeer om ALTYD 'n geel mens te wees en boonop gaan ek van my geel verfoorhou sodat ek die hol mense se ontbytverf met geles kan omruil.*

## ***Sonstorie***

*Maria was sestien maar van lankal af het sy geweet sy's eintlik ouer.*

*Sy was haar ma en pa se kind, maar hulle was nie haar ouers nie. Die son was haar enigste vriend en syself was haar dagboek.*

*By die son het Maria geleer om heel eerste vir God dankie te sê as sy opstaan. Die son doen dit altyd, want hy behoort aan God.*

*Terwyl sy in die skool was, het sy steeds soos die son probeer lewe. Sy het geweet hy is buite besig om die leer hoër en hoër te klim en sy wou nie agterraak nie.*

*Sy het somme gedoen, omdat sy geweet het die son tel die trappies sover soos hy klim en sy het sinne gebou, omdat dit haar gehelp het om met die son te praat en hom te verstaan.*

*Kunsklasse was vir haar die heel lekkerste. Dan het sy die son op verskillende maniere geverf en as hulle moes maak soos die juffrou sê, het sy alles in geel geteken.*

*Ná skool het sy met haar fiets agter die son aan huis toegery en altyd verby skaduwees eerder as bo-oor hulle gery.*

*Met skoolvakansies kon sy heeldag by die son wees en saam met hom gaan slaap en opstaan. Hy kon alles op die aarde sien gebeur en het vir Maria vertel dat dit beter was om in die lug te woon. Maar die Stasiekantoor kon nie vir haar sê of daar enige treine hemel toe ry of nie.*

*Haar kamer was geel en oranje, maar haar ma en pa s'n was blou en grys. Sy wou nooit soontoe gaan nie, want dit was dieselfde kleur as wanneer die son saans gaan slaap het.*

*Hulle het haar na 'n psigiater geneem, maar sy het nie van sy vaalgroen kantoor gehou nie. Eers toe hy haar op 'n geel stoel laat sit het, het sy met hom begin gesels.*

*Sy was nog 'n paar keer by die psigiater. Elke keer het sy net gemaak of sy na hom luister, want eintlik het sy geweet hy is ook in skaduwees gebore. Daardie aand het sy haarself in haar kamer gaan toesluit en eers 'n brief vir die son en toe een vir die skaduwees geskryf.*

*Net na skemer het sy met haar fiets stad toe gery en iewers langs die pad affodille gekoop om in haar hare te rangskik. Sy het saam met haar fiets in die hyser opgegely tot by die heel boonste verdieping, waar haar pa gewerk het en gekyk hoe die son verdwyn. Eers toe sy heeltemal seker was dat die son gaan slaap het, het sy op haar fiets geklim en die lug ingery. Driekwart op pad ondertoe het sy geweet sy*

*gaan haarself met die son verenig en haar lewe vir die skaduwees gee.*

*Sy was sestien en het die volgende oggend saam met die son deur die skemer gegloei en die trappies geklim, totdat sy in die middel van die lug gaan stilstaan het.*



## ***Die wêreld is 'n speeltoneel***

*Hulle hang ingeryg in my kas – my maskers. In helder oogknip-kleure is elkeen anders; spesiaal en nie-spesiaal. Ek hoef hulle net af te haak, op my gesig te laat pas en te voel hoe hulle my gesigsprofiel aanneem.*

*Heel voor in die ry, hang my vrolike masker. Ek gebruik hom die meeste sodat hy nou al maklik op my gesig pas. Ek ken my vrolike rol en toneelspel ook die beste. Dit hang net af van die verhoog.*

*So 'n entjie agter my vrolike masker, is my hartseer masker. In sy swart en wit kleure, vertolk hy sy rol op grys verhoë en die trane wat oor sy wange loop, maak erosie-merke daarop. Meestal is dit oor die lewe wat hard en seer is.*

*Verder af in die ry hang die kwaai masker. Ek wil hom nie hê nie en gebruik hom baie min. Dis hoekom hy nog feitlik nuut is. Boonop pas hy skeef op my gesig. Ek weet my vrolike masker is net onder hom, maar as ek my kwaai masker op het, is ek nie ek nie.*

*Ek het nog baie maskers in my snoer. Daar is my pastelpienk masker wat ek opsit as ek gaan slaap. My pers masker waarmee ek mense beïndruk, my sportiewe masker en my werkmasker hang almal in die ry. My borriegeel masker, my kobaltbloue en die groene en die vlamoranje*

*ene pas almal op my gesig en hulle ken ook al hul woorde uit hul koppe.*

*Heel agter in die ry hang my onsigbare masker. Ek sit hom altyd op onder my ander maskers. Niemand kan hom sien nie, behalwe Een. Ek haal hom baie min af en hy pas die beste op my gesig. Hy steek niks weg nie en wys wie ek regtig is. Sy verhoog is die Lewe self. Oral en altyd is hy op sy pos. Dit is wanneer ek sien hoe ander mense sukkel om toneel te speel dat ek bly is ek het my onsigbare masker.*

*Eintlik het ek nie die ander maskers so nodig nie. My onsigbare masker is genoeg. Maar sonder my ry maskers sal my toneelspel swak wees. Hulle almal help my om elke dag beter en beter en nog beter toneel te speel, sodat ek eendag in die middel van my verhoog kan staan met 'n Oscar in my hand en my onsigbare masker op my gesig.*

## ***Vandag is die eerste dag van die res van my lewe***

*Dokter Fitzhenry. Vreemde van. Dalk het hy ook ander, vreemde oplossings vir moegwees.*

*Die spreekkamer is vol mense. Vol mense wat nog nie heeltemal mens is nie. Selfs 'n vrou met 'n mongooltjie het nou ingekom. Kyk net die ogies. Siestog. Daar staan die vrou op. En die mongooltjie kom na my toe ...*

*Jy ken my nie,  
maar jy kom*

*'n Pienkste malvalekker  
uit die plastiek  
van Beacon sweets company beperk*

*en tuimel  
my spreekkamerkoffie hartstogtelik  
binne.*

*Jy ken my nie,  
maar jy kom*

*en ek proe  
met my honger tong  
jou armpies wat om my nek dryf*

*skuimerig soet,  
jou taai toffietrappers op my verbaasde  
skoot.*

*Jy ken my nie,  
maar jy kom*

*en ek sluk  
hap-hap en versigtig  
netnou raak jy op*

*aan jou ogies  
rond  
net effens skeef.*

*Jy ken my nie,  
maar jy kom*

*en ek drink  
van jou driewiel  
jou hond  
en netnou se lekkers.*

*Jy ken my nie,  
maar jy kom*

*en leer my  
van sin,  
genade – skewe ogiesvol.*

*Nee, Dokter  
ek het jou dienste nie meer nodig nie  
iemand gee tóg om  
'n kind 'n hemelkind  
kind wat uit die hemel kom*

*en Dokter,  
vandag is die eerste dag van die res van my lewe ...*

## ***Die gesig in die spieël***

*Vir Jaco*

*Hy voel-voel versigtig oor sy weerkaatsing in die spieël.*

*Hy dink.*

*Wat gaan hy doen?*

*Hy sal deur Stellenbosch fiets en al sy onthou-plekke  
en onthou dinge weer uitsnuffel.*

*In die spieël sien hy sy oë lewe en hy volg die buitelyne  
van sy profiel oor en oor. Hy kyk stip na sy skouers wat op  
en af bewe. Hy haal asem.*

*Hy sal gaan branderplankry by Blouberg en die see rondom  
hom voel lewe. Hy sal weer swem. Hy sal diepsee-duik  
en God ook onder die see leer ken.*

*Hy sal gaan draf. Hy sal voel hoe sy bene ritmies rondskuif  
en hy sal die grond onder sy voete voel verbybeweeg.  
Sy spiere sal saamtrek en verslap om hom krag te gee  
en hy sal nie moeg word nie.*

*Hy sal gimnastiek doen: Sy liggaam strek en rondwoel,  
sy arms swaai en sy spiere laat juig op die rekstok  
en die ringe, sy rug boggel in 'n agteroor-salto.  
Sy bewegings laat lewe op die ritme van musiek en sy kop  
vooroor laat hang vir die goue medalje.*

*Hy sal dans. Rock 'n roll en twist en wals en polka.  
Can-can en hoela-hoep. Die foxtrot, die tango, die cha-cha  
en die bop. Charleston en breakdance en sommernet  
gewoonweg dans.*

*Hy dissekteer elke deeltjie van sy spieëlbeeld.*

*Hy sal weer lewe, met sy oë sal hy die wêreld inasem  
en elke krieseltjie skoonheid sal hy stadig verteer,  
totdat dit permanent deel van hom is. Sy ore sal uitreik  
na alle klanke en alles sal in sy gedagtes meng  
tot 'n surrealistiese musiekstuk. Hy sal voel hoe geure  
sy neus binnevroetel en een-een kom vassteek.*

*Met sy liggaam sal hy voel hoe dit rondom hom lewe:  
sy wang teen die ruwe oppervlakte van 'n tekstuur-skildery,  
sy vingers wat bo die warmte van 'n kaggelvuur  
klavierspeel, sy voete wat klein kunswerkies in seesand  
skep, sy rug waarteen reëndruppels glyplank ry en sy nek  
wat deur 'n warm wolserp toegevoeg word.*

*Elke selletjie in sy liggaam sal hom weer laat lewe –  
net soos sy afbeelding in die spieël.*

*En toe hy omdraai, weerkaats die spieël net 'n oomblik  
teen sy rolstoel se wiele.*



**CORDIS TRUST PUBLIKASIES**

Posbus 73592

Lynnwoodrif

0040

[www.cordistrust.co.za](http://www.cordistrust.co.za)





